

rhagoidémve tunicam concrecentes, hoc malum efficiunt dum pupillę foramen obstruunt; vnde externarum rerum simulachra quę ad videndi facultatem importari debent, ratione obstructionis impediuntur, ne crystallino humori, qui præcipuum est instrumentum visus, communicari possint.

PROGNOSTICA. Inter leuiores suffusiones ea deterior est, quę grauioribus morbis, ex magnisque capitis doloribus orta est: poteritque in principio hoc malum curari; verum si diu constiterit, suffusio que glaucescat, oculus visu priuabitur. ferè autem, quę sine splendore est suffusio, & quę ad candorem vergit, curam non recipit. Rursus si liuida, nigra, vel multum flaua est suffusio, neque medicina, neque acu curari poterit; sic nec ea quę nihil concrecentis materiei intuentibus exhibet, sed oculi videntur clari atque sereni, & tamen nihilominus nihil vident, diciturque gutta serena, tunc nihil quoque in suffusione medicamentis proficiemus, quę pupillę figuram commutauit. Si humor panniculi consistentiam fuerit consecutus, non nisi acu per corneam transmissa curari poterit, necessumque est vt humor concretionem firmitudinem consecutus sit; nisi enim acui subici possit, anceps esse solet cura: in quintum autem vsque annum acui inidoneum esse solet concretum; vetustatem autem si sapiat, curam non admittit. Si autem id quod accrescit, perfrictum diducitur, neque sic manet, sed iterum rediens iungitur, colorémque exhibet obscure album, curam admittere videtur.